

Ольга Панкovo

**АМАРЭ
ДЫВЭСА**

Г И Х Л ' О 1 9 3 3

ОЛЬГА ПАНКОВО

АМАРЭ ДЫВЭСА

ГИЛЯ

Г.П.Б. в ЛАТ

Ц. 1933 г.

Акт № 213



ГОСУДАРСТВЕННО	ИЗДАТЕЛЬСТВО
ХУДОЖЕСТВЕННО	ЛИТЕРАТУРА
Москва	1933
	Ленинградо

2

На цыганском языке

ОЛЬГА ПАНКОВА

НАШИ ДНИ

Стихи

ГИХЛ

Редактор А. ГЕРМАН
Техредактор ГАВРИЛОВ
Обложка худ. В. ХЛЕБОВСКОГО

РОМ ЛАТХЬЯ ДРОМ НЭВО.

Ёв парудя гадженца грэн,
Лодэлас пашо вэш шатрэнца,
А пиро гав ромны псирдя
Тэ зумавэл гаджен патренца.
Ададывэс ёв сы чяло —
Ромны андя хабэ гавэстыр,
Гэнштос дрэ гав ёв парудя
И упрэдыр лыя гаджестыр.
А про вавир дывэс нисо нанэ,
Ровэна чяворэ бокхатыр.
Гыя брышынд. Щылалыпэ.
Рискирла шатра балвалятыр.
Дро гав нашты тэ сыкадёл—
Гадже умарна лэс дэстэнца.

Ром дошалэ грэс бикиндя,
Ромны-жэ хохадя патренца.
И прихаяпэ джиибэ
Адасаво романэчявэскэ—
И бокхалэскэ тэ явэл
И тэ дарэл дошэндыр лэскэ.
И чюрдыя ром шатры, фэлды.
О вэш... саро ёв чюрдыя,
И пхуранэ э-джиибнастыр.
Ёв дро колхозо дром латхья.

КОМСОМОЛКА.

Бияндыя дрэ шатра,
Дрэ фэлда бария.
Дад парудя э грэнца,
Дай пирогав псирдя.
И бельвеляса пашэ яг
Шутлага даса кэрадя,
Ушты прэ атася кхамэса,
Маро дрэ гав ёй скэдыя.
Нэ акана ёй на скэдэла,
Акана на псирла пирогав.
Ёй про заводо буты кэрла,
Одой латхья ёй пэскэ бахт.
Ёй акана сы комсомолка,
Сы прэ шэро лоло дыкхло.
Акана дрэ ряды бутяритка
Ёй джяла пирогав дром нэво.

САРЭ ПАЛЭ БУТЫ.

Палэ буты сарэ тэ ласпэ
Амэ бангэ сам акана,
Соб тэ кэрас э-пятилетка
Могискирдям-б дро штар бэрша.
А со ачъяпэ пхурано
Амэ саро тэлэ счюрдаса,
Соб дром Советско амаро
На сыс бы пхуранэ блатаса
И мэк бутякирэ вастэстыр
Барьёла джиибэ нэво,
И сыр састыр тэрдо прэ стрэга
Мэк тэло знамё бутярно.
Мэк ряды зоралэ бутитка
Барьёна, сыр тэрнэ вэша,
И прэ холы э барвалэнгэ—
Кэраса пандж дрэ штар бэрша.

ОСЕНЯКИРО.

На пэтькирла кхам акана адякэ
И дывэс уж тыкнэдыр ачъя,
Э брэзэндыр листыцы са пэрна.
Палэ фэнштра о-брышынд гыя.
Здыкх про болыбэн, одой стаенца
Урняна чириклэ дро дурипэ.
Ёнэ, сыр о-рома шатрэнца,
Родэна пэскэ миштыпэ.
Улыджино саро фэлдэндыр,
На колосиныпэ э гив
Сыг акана барэ пластэнца
Прэ пхув пасёла парно ив.
Прэ фэлда акана ромэн
На удыхэса ту шатрэнца.

Ром чюрдыя о пхурано—
На парувэла ёв э-грэнца.
И на тырдэнапэ рома
Пиро дрома э-урдэнэнца,—
Бугло и дур дро болыбэ
Урняна чириклэ стаенца.

БУТЯРИТКО СВЭНКО.

Шэрэ калёна,
Якха хачёна,
И дро васта
Лолэ знамёна.
Ададывэс —
Дывэс бутитко,
И кхам про болыбэ
Свэнкитко.
Сарэндэ
Рада прэ муя,
Дур, дур
Чивэнапэ гиля.
Ададывэс
Про дром бутитко
Ром выгыя
Ёв-бутяритко.
И дрэ гэрой

Э-бутярняса
Ромны проджяла
Пирэ гаса.
Ром пхурано
Парнэ чёрэнца
Гыя пашыл
Пионерэнца.
Радаса
Марлапэ ило,
Ададывэс
Ёв бахтало.
Сарэ святостыр
Бутярья,
Сы машкир пэстэ
О-пшала.
И адалэстыр
О-якха
Хачёна, сыр
Чергэнорья.
И сала кхам
Про болыбэ
И бичявэла татыпэ.

**СО АКАНА ВАШ АМЭНГЭ
О-ФЭЛДЫ.**

На камам
Тэ рипирав
Э-ясвэнца
Одо дром,
Саво дада
Прогынэ,
Тэ рипирав
Палэменька
Пхураны,
Палэ бикхэритко
Бокхало
Лодыпэ.
Акана
Джиибэ
Парудяпэ,—

Бутяритко
Э-вэсна
Авья.
Пхурано,—
Со сыс,
Саро роспыяпэ.
Манушэса
Бутяри
Ачья.
Со акана
Ваш амэнгэ
О-фэлды,
Со акана
Ваш амэнгэ
Вэша,
Коли стройка
Соцыалистическо
Сыр
Ангрустяса
СССР
Обухтылдя.
Коли пашыл

Выбарьёна
Заводы,
Строинэнапэ
Шахты
Нэвэ.
Жыко шатры ли
Сы э-ромэскэ,—
Заухтылдя
Лэс
Нэво
Джиибэ.
Дро шэро-ли
Акана
Сы э фэлда?
Балвалитко
Гилы
Угыя.
На камам,
Соб рат калы
Брышындэса
Пашэ
Шатра рискирды

Зарундя.
Прогыя
Джиибэ
Лодыбнытко,
прогыя
Джиибэ
Романо,
Нэ сэмэнца
Ачьяпэ
Э фэлда—
Пало тракторо
Ром
Сы тэрдо.
На урдэн
Пхагирдо,
На о-цыпо.
Одова
На рисёла
Палэ.
Муршканэс
Ром тэрдо
Пало тракторо,

Роспахинэ
О-фэлды
Буглэ.
Прэ заводу,
Кай гудки багана,
Кай састырэса
Ракирна
Чёканы.
Тэлэ васта
Буты
Хачёла
Ягаса.
Ром
Выкэрла адай
Промфинпланы.
Сарэсвэтытко
Пролетариатоса
Дрэ гэрой,
Сыкавэла
О дром
Ленинизмо.
Ром — бутяри

Джяла
Ангил,
Джяла
Ко соцыализмо.

РОМАНЫЧЯЙ

Злокостыр
 жыко рат,
Пало псикэ
 торбаса,
Дро мразо
 джяса ту,
И хачькирдэ
Лынаса.
Тыкнэ масэса
 про васта,
И пало васт
 Ваврэса.
Прэ тутэ
 Мина чёрори.
Ту рада —
 На дыкхэса.

Сыс дэшупанджтѳ
тукѳ бѳрш,
Коли авнѳ
Дрѳвцаса.
Тут на лынѳ
И тѳ пучен.
Камаибнаса ль
Джяса?
Шѳро дымкаса
Выпхандлѳ.
Трин дывѳса
Пинѳ душлендыр.
И дрѳ бѳявитка дывѳса
Прѳ фѳлда
Стоно сыс
Гилендыр.
И акана ко ром
Дрѳ шатра
Бѳяв прогыя
Сыр о-суно.
Дром джиибнытко
Ромнорьятѳ

Сы э чюпняса
Протходо.
О ром-хулай,
Со ёв пхэнэла:
Банги ромны
Лэс тэ кандэл.
Шэро дэстэса
Розпхагирла
Дарэла лав
Ёй тэ пхэнэл.
Балвал уинэ
пирэ фэлда
Дрэ шатра
Бокх и шылыпэ
Шуко маро
Ададывэс
А атася—
Нисо нанэ.
Ром холятыр
Сыр
Рув,
Псирэла.

Лэс про
Тарго
Э-бибахт
Марэла.
Гэншто грай
Сыс,—
Цыпоса
Ачья.
Ада
Бидатыр
О-ром
Запия.
Сарэ бэдэ
Гаспря
Прэ бравинта
Пропьела.
Дрэ ада дывэса
Ромны
Шатратыр
Нашэла.
Сыр листы
Осенякиро

Чяворэ
Шутёна.
Бокхатыр
Просовэнапэ
И бокхалэ
Пасёна.
И пиро фэнштры
Котэра,
Бэдэ ромны
Дывэсэскэдэла.
Пхэрдэ вартуха
Кэ бельвель.
Кхины, дрэ шатра
Ёй анэла.
Мэлалэ чяворэ,
Розчидэ.
Ило прэ лэндэ дыкхи
Викирнёла.
Пирангэ сы,
Хоть пхув шылалы
Гара ивэстыр
Парнёла.

И саро пхарипэ
Джиибнастыр,
Джиибнастыр
Дрэ шатра рискирды.
Дрэ романо джиибэ
Би радыбнытко,
Сари менька прэ ромнятэ
Тходы.
Нэ адава
Сыс гара.
Коли тагари
Тэ рая сыс прэ пхув хулая,
Нэ акана
Дэшупанджто бэрш джяла.
Саро вавир.
Ваврэ прэ пхув мануша.
Акана
Романычяй могискирла
Свободнонэ гражданкаса
Тэ явэл
Ромэс-хулас
Тэ сасья-саплыня

Коли про дром тэрдэ—
Ко бэнг тэ бичявэл.
Дрэ горой джювлы
муршэса могискирла
Джиибэн нэво, лачё
Тэ строинэл.
Акана нанэ чюпны,
— Со затховэлас.
Нанэ бутыр лакэ
Конэстыр тэ дарэл.

РАТУНО ДЫВЭС.

Джиибэ, сыр рат кало,
Пиро годы мардя чюпняса.
Сыс замардэ о-мануша
Ило на марласпэ радаса.
И дывэсэстыр о-дывэс
Са пхарэдыр сыс джиибэ,
Сарэ зорьятыр вымардэ
Гынэ ко крали бутярнэ.
Лэн лыджия кэ ёв рашай.
Годяса фрэнто — дад Гапоно.
Патяибнаса мануша, гынэ
И лыджинэ иконы.
Обгалынэпэ мануша,
Рашай Гапоно придыя.
А крали полко хэладэн
Прэ бутярендэ бичядя.

И пиро гасы рат чидяпэ
Рэкаса одова дывэс.
Казаки чингирдэ шашкэнца,
Сыр о-кашта, э-манушэн.
Нэ бутярнэ на бистырдэ,
Кицы о-рат сыс прочидо
И лав дынэ тэ рипирэн
Дывэс одова — ратуно.
Бут проурняндынэ бэрша,
Ёнэ лав са жэ зрикирдэ
Кралис нанэ. Саро нэво.
Вавир ачъя о-джиибэ.

КОМИНТЭРНО.

Заводы, уштэнте,
О-ряды скэдэнте.
Васта зоралэ
Прэ хуландэ
Газдэнте.

Дыкхэн карэдын,
Сы адай ли сарэ.
Уштэнте бутитка,
Джян дро марибэ.
Дурал тэлэ стрэга
Булярья бэшэна.
Сарэ тасадэ,
Сыр екх ванта,
Уштэна.

Фашыстско тэроро
Нанэ дарано,

Парно розмараса
Авэла лоло.
Джян ко коминтэрно,
Уштэн зоралэнца
Бутитка сарэ
Джян — тэрдён
Советэнца.
Про фронто лоло
Марибнытка амэ.
Бутярья про фронто
Дрэван зоралэ.
Сы зор Ленинизмо
Ёв дром сыкавэла,
Ёв про капитало
Сарэн
Бичявэла.
Дуй класы сгынэпэ, —
Адай марибэ.
Советско Союзо
Сы — задэибэ.
Заводы, уштэнте,
О ряды скэдэнте,

Васта зоралэ
Прэ хуландэ
Газдэнте.

Дыкхэн карэдын,
Сы адай ли сарэ,
Уштэнте, бутитка —
Джян дро марибэ.

АМЭ ТЭРНЭ О-МАНУША

Одой, адай выбариям,
Сыр саструнэ амэ
Аваса пэрвонэнца
Амэ дрэ марибэ.
Амэ тэрнэ о-мануша,
Амэндэ бут зорья.
Ко станки сам амэ тэрдэ,
Амэн бут дрэ гава.
Пхураныпэ сы розмардо
О-пхурано нанэ нисо.
Бутитконэнгирэ вастэндыр
Барьёла джиибэ нэво.
Сымэнца карэдын амэнгэ.
На трашавэла марибэ,
Амэ лыджяса палэ пэстэ —
Саро свэтытко тэрныпэ.

Амэ тэрнэ о-мануша.
Амэндэ бут зорья,
Ко станки сам амэ тэрдэ,
Амэн бут дрэ гава.

ЛЕНИНО МЫЯ.

Еня бэрш
Одолэскэ палэ.
Дро дывэс
Мразуно ивантытко
Рипирава,
Гыя шуныбэ,
Со мыя
Баро мануш
Партиитко.
Сыс бутэндэ
Ясва дро якха
О муя,
Калэдыр сыс пхувьятыр
Мразуно ивантытко
Дывэс.
Вырискирдя

Лыджяибнарис
Партиятыр.
И колоны
Гынэ дывэсэ
И ратяса
Гынэ о-колоны,
Дро васта
Э мразостыр — шылалэ
Лыджинэ
Лолэ калэса
Знамёны.
Дро дывэс
Мразуно ивантытко
Бутярендэ,
Сыс бар про ило.
И холы прэ мулыпэ
Битангипнытко,
Со улыджия
Сарэсвэтытко
Шэро.
Нэ нанэ пирó ило
Большэвикэнгэ

Тэ тангискирэн
Пало трупo муло:
Лав дынэ хачькирдо
Пролетарии.
Тэ на бистрэс,
Со ракирдя
Мануш барo.
Чирикленца
Бэрша проурняндынэ
И уж сыго проджяна
еня
Одо поратыр
Сыр екхвар ивантытко
Партия
Ильичёс
Нашадя.
Нэ инке
Мэк проджяна
Бэрша.
О ивант мэк лынай спарувэла.
Зрикирдо
Бутяренца о лав

Мыя о-Ленино,
Нэ рэндо лэскиро
Дживэла.

ШОВТО СВЭТОСКИРИ ЧЯСТЬ.

Пролетарии
сарэ свэтостыр
Скэдэнапэ
адай.

СССР
бутитконэнгэ
сы родно
дай.

О-немцы,
англичяне,
татары
и рома.

Дрэ строга
Советэнгири
сарэ ёнэ —
пшала.

Нанэ хулай
капиталисто,
Вихроса
лэс адай кэрдэ.

Сыс и о-троно
тагарискиро,
нэ лэс
бутярья розмардэ.

Дэшупандж бэрша
одоләскэ
счюрдынэ сыс
пэнты пхарэ.

И акана
дро стро́на бутитко
Виисона
флаги лолэ.

Адай,
дрэ шовто свэ́тоскири чясть
сарэ бутитка — пшала
машкир пэстэ.

Нанэ хулан,
нанэ рабэн,

Думэ тэ бандькирэс

Нанэ ангил конэстэ.

Заводы, фабрики

о-шахты.

Хулай сарэскэ

бутярно.

Нэвэ стронаса

могискирла

тэ правинэл —

ёв екхджино.

Про штэто,

кай гав пхурано,

сыс

тэрдо

Барьёла

колхозо

нэво

зорало.

Тысенцы бэрша,

кай

паны

тхадья.

Саро, со
 прэ дром
 сыс тэрдо —
 хаськирдя.

Акана-ж
 спатькирдэ
 ада зор
 о-плотины.

Зоралэ
 и барэ
 утходэ сы
 турбины.

Нанэ Днепро
 холямо.
 Гребнёса
 волны на уштэна

Акана ёв вавир.
 Лэс
 Днепростроё
 кхарэна.

О-Турксибо амэндэ
 кэрдо.

Кхэтанякирдо
Туркестано Сибиряса.
Акана Сибирятыр
маро.

Туркестаностыр
о хлопко

лыджяса.

И саро миштыпэ адава
токо дрэ СССР,
кай тасадо
капитализмо,

Кай,

сарэ бутяритка — пшала.
Кай, барьёла
Соцыализмо.

ПЭРВО МАЁ АМЭНДЭ И ЛЭНДЭ.

Гэрой дрэ гэрой
Колоны джяна,
Знамёны лолэ
Сыр бы урняна.
Гилы розчидяпэ,
Сыр рэка дурал.
Колоны ангил,
Колоны палал
Колоны бутитка
Кэ плошшядь поджяна.
Дро болыбэ
Аэропланы урняна.
Свэнко бутитко
Баро ададывэс —
Пэрво Маё

Кхарэна лэс.
Дур адатхыр
Дро кхэра старибнытка
Амэндыр дур
Бэшлэ бутитка.
Одой, кай
Тэроро парно зорало,
Бутяри одой
Палэ ванта бэшло.
Хулая барвалэ
Нартысона дрэван.
А лэнгэ инке
Подбагана палал.
Дэвлытка мануша
Грубонэ пэрэнца —
О рашая
Дро васта трушылэнца.
Ёнэ бутярен, хай,
Пшалэнца гинэна.
Кокорэ-ж барвалэнца
Екх рэндо пхандэна.
И дэвлэскрэ лавэса

Сарэ чёрорэн.
Трушылэса дро васт
Рашай придэла сарэн.
Коли адай — дро Советы
Знамёна урняна.
Дур амэндыр, дрэ гэрой
Бутярья джяна.
И адякэ-ж знамёны
Урняна лолэ.
Нэ ракхэна о-шпэры
Парнэ хэладэ.
Барвалэнгэ о-свэнко
Бутитко лоло,
Сыр о-лон прэ пори
И дрэван трашано.
И шэлэнца одой
Дро дывэс адава.
Лэн розмарна холятыр
Парнэ хулая.
Прэ гэра, прэ васта
Састыра урьявэна
Тэлэ стрэга зоралы

Дрэ баро кхэр тховэна.
Нэ капиталистэнгэ пхаро
Тэ затрашавэс бутярен,
Бэрш бэршэстыр са бутыр
Ачела пролетариен.
Дывэсэстыр о-дывэс
Холямэдыр барвалэ,
Нэ ваш лэнгэ ублады,
Готовинэна бутярнэ.
Сыг авэла дывэс,
Коли дрэ строны сарэ,
Сыр дрэ СССР,
Парувэлапэ джиибэ.

АМАРО ЗАДЭИБЭ.

Задэибэ сы амаро—
Тэ хаськирэс со сы кирно
И соб прэ штэто пхурано
Тэ выбарьёл саро нэво.
А адава амэ кэраса
И лав тэ дас могискираса,
Ведь мурш баро сы бутяритко
И прэ буты ёв марибнытко.
И сыкадо уж сы прэ рэндо,
Савэ бутярья сы амэндэ
Дро штар кэраса пандж бэрша.
На сам со-ли амэ мурша?
Нэ набут адава инке,
Задыбэна сы и ваврэ.
Савэ мангэна бут зорья
Лаче шэрэ и о-якха.

Пхэнаса хоть пало гава,
Савэ одой акана лава
И со гавитка мануша
Думискирэна акана.
Ангил кралистэ чёрорэ,
Джиндлэ, сыр тэлэ пхув кирмэ,
Сыс э-кралиса замардэ
И кулакоса тасадэ.
Нэ э-Советско власть авья
Чёроро пэстыр счюрдыя
Тасайбэ бутэ бэршэн,
Нэ о-кулаки на камэн.
Сыр пхус дрэ якх сы лэскэ власть,
Дыххэла ёв со лэскэ хась,
А ангил мулыпэ матхин
Дандырлапэ дукханэдыр.
И пашыл пэстэ ёв скэдэла
Адасавэн, кон лижынэла
Прэ лэскиро скаминд чярэ,
А одолэ сы, сыр бакрэ.
Лэн кхарна подкулачникэнца
И кхэтанэ кулако лэнца,

Ев прэ колхозо хась родэла,
Нэ уса екх на розравэла.
Прэ стрэга сы тэрдо бутяри,
Ваш кулакоскэ ёв сэндари.
И кулакоскирэ рэндостыр
Хась отлыджяла колхозостыр.
Соб дрэ гавитко барипэ
Баро кэрдо сыс миштыпэ
Бутяри тэ кэрэл банго —
Пхэнава, коль камэн мэ со.
Тэ вычюрдэл дэстэ ротэндыр.
Савэ втходэ сы кулакэндэ, —
И отэнчя прэ класо лэн
Тэ пролыджял хаськирибэн.

ДНЕПРОСТРОЕ

Бут тысенцы бэрша
Тхадынэ о-паня,
Со про дром попыя —
Одова хасия.
Холямо, сыр о-рув,
Ада Днепро бугло,
И пирдал тэ проджяс
Сыс дрэван дарано.
Тэлэ волны Днепровска
Бара зоралэ.
Розмардэпэ дрэ лэндэ
Корабли барэ.
О-кхэра, манушэн,
Сыр матхьен, о-паны
Крэнцындя и дурал
Лыджия, лыджия.

Днепро биды барэ
Манушэнгэ андя,
Бут дрэван миштыпэ
Дро паны хаськирдя.
На ивяя ж тэ тхадэл
Могискирла паны
И баро миштыпэн
Тэ анэл вайш буты,
И о-Днепро бутыр
На тхдэла ивяя
Гидроэлектростанцыяса
Ёв ачья.

ЛОЛЫ АРМИЯ.

Советско армия Лолы
Прэ стрэга зоралэс тэрдэ,
Дурал ёй ворогос дыкхэла.
Миштэс Советы ёй ракхэла.
Прэ рой паны тэ тасавэл
Амэн буржуё са камэл,
Советы лэскэ, сыр чюри,
Дрэ пашваро запусады.
Капиталисты, сыр бырля
Ухтэна, кэрна арманя,
И сыр ни сыр амэн камэн
Тэ тасавэн, тэ розмарэн
Нэ Лолы армия джинэла,
Со капиталo думинэла.
Ёй зорало отпоро дэла,
Нэ марибэ на домэкэла.

Адыкэ армия пхэндя,
Коли ваш марибэ шундя
„Врогэн амэ на домэкаса.
Советы са-ж зашшитинаса“.

КЭ БУТЫ КХАРЭНА

Форья бияндёна
 заводэнца,
Заводы уштэна
 корпусэнца,
Гудки гудинэна
Кэ буты кхарэна.
Пирэ фэлды дрэ Советско
 стро́на
Джяна тракторна
 колоны,
Хор пхув вспахинэна —
Кэ буты кхарэна.
Капиталистэндэ о-домны
 мурдёна.
А амэндэ дрэ Советы
 захачёна.

Бут састыр ёнэ строкакэ дэна —
Кэ буты кхарэна.

Прэ фабрика, кай бутякирна
тхан.

О-ситцо, пхар и о —
похтан.

Челноки англэ — палэ псирэна —
Кэ буты карэна.

Вышки нефтяна гордэс
тэрдэ

Учес о-шэро ёнэ
газдынэ

Бут нефть строкакэ ёнэ дэна —
Кэ буты кхарэна.

Хор тэлэ пхув шахтёры
бутякирна,

Марна киркаса — порода
пхагирна.

Баруно вангар дорэсэна —
Кэ буты кхарэна

Заводы уштэна
корпусэнца,

Гава бияндёна

колхозэнца

Соцыализмо барьякираса —

Сарэ прэ буты джяса.

СТАНКИ РАКИРНА

Станки ракирна
Гудки багана,
Бутярья тэрдэ,
Конвейры прастана.
Прэ лэндэ гайкицы,
Оси, роты
Скэдэна автомобили
Отчивэна пулемёты.
Чёканы марна
Састыр бандёла
Дро бов инке вангар —
Ёв лолёла.
Станки ракирна,
Гудки багана,
Бутярья тэрдэ,
Конвейры прастана.

БЕЛЬВЕЛЬ ДРЭ ШАТРЫ

Кхам пало вэш
 гарадыя
Прэ пхув э-рат
 змэкьяпэ,
Сутэ дрэ вэш
 чириклорэ
Чергэн захачияпэ.
Дрэ фэлда пашыл
 вэшоро
Тэрдэ рома
 шатрэнца
И фэлда дрэ да
 ратори
Хачёла э-ягэнца.

Чавэ чая пашо
яга,

Дурал гиля
Урняна

Хачёла пхув тэлэ
Гэра

И о псикэ издрана.

ДЭШУПАНДЖБЭРШЫТКО

ДРОМ

Дывэса хачькирдэ —
марибнытка
Дэшупандж бэрша палэ
прогынэ
Прочидо бут сыс рат
бутяритко
Нэ о тагарья Октябрёса
тасадэ.
Чячипэ бут андя о
Октябрё
Пхарипэ бут баршытко
злыя
Счюрдыя пэстыр пэнты
бутяри

Учедыр о шэро
газдыя.
Октябрёса о дром
откэрдяпэ
Ваш сарэнгэ кон сыс
тасадо
Ваш одолэнгэ, кон насыс
манушэнца
Коли тагари сыс про троно
бэшло.
И гынэ пирó дром
Октябрёскиро
Дэшупандж бэрш бутярья
гынэ
Нартымаса гынэ, сарэ
зорьенца
Хулаибэ дрэ риг бари
газдынэ
Акана советско риг
барьёла
Роскхувэла пэскирэ
зорья

Дрэ колхозна фэлды ёй
буглёла
Учедыр газдэла о
бутя.
Зоралэс барьёла э
культура
Обухтылдя сарэн
сыкляибэ
О ром, саво сыр рув джиндя
вэкэнца
Отчюрдыя дур пэстыр
лодыбэ.
Ко джиибэ нэво
потырдыяпэ
Заухтылдя нэво лэс
джиибэ
Э фэлда бистырдыя парнэ
шатрэнца
Хачькирла ёв кирно
пхураныпэ.
Барьёна романэ
колхозы

Э лылвари ром
галыя
Дро марибэ пал
промфинплано
Лачи буты ёв
сыкадя.
Авья Октябрё
культураса
Дрэ риг, сави със
розрады
На ивья прогыно ратуно
дром —
Марибнытко буты сы
дыкхны.

АМАРЭ ДЫВЭСА

Амарэ дывэса
Кэ буты кхарэна
Пролетарии дрэ риг
Соцыализмо кэрэна
Ром адякэ жэ банго
Тэ на отачел
И активно учястиё
Дрэ строительство тэ прилэл.
Коль камэл, соб дрэ риг
Розкхудяпэ хулаибэ
Бибутякирибэ соб — хасия,
Собы на сыс чёрорипэ
Собы шатра бутыр
Прэ фэлда на сыкадыяпэ
Соб культура ромэндэ
Учедыр газдыяпэ.

Собы капитало експлоатацяса
Сыс пхувьятыр скхостно
Соб и дрэ риги ваврэ —
Тэ захачёл знамё лоло.
Соб тэ буглён колхозна фэлды
И о заводы тэ барьён
И собы тракторна колоны
Прэ кхам апрельско тэ хачён.

СО СЫ ЧИНДЛО:

Ром латхья дром нэво	3
Комсомолка	5
Сарэ палэ буты	6
Осенякиро	7
Бутяритко свэнко	9
Со акана ван амэнгэ о фэлды	11
Романычяй	17
Ратуно дывэс	24
Коминтэрно	26
Амэ тэрнэ о мануша	29
Ленино моя	31
Шовто свэтоскири чясть	35
Пэрво маё амэндэ и лэндэ	40
Амаро задыбэ	44
Днепростроё	47
Лолы армия	49
Кэ буты кхарэна	51
Станки ракирна	54
Бельвель дрэ шатры	55
Дэшупанджбэршытко дром	57
Амарэ дывэса	61

Огиз ХН-61 № 215. Тираж 1 000 экз. Уполномоченный Глав-
лита Б-21082. Сдано в набор 23 октября 1932 г.

Подписано к печати 20 декабря 1932 г.

Формат бумаги 62 × 94/32

1 б. л. по 52096 зн.

З. № 1405

2 п. л.



Цена 50 коп

3444-

Цыг.
1-2.



ОЛЬГА ПАНКОВА
НАШИ ДНИ
На цыганском языке